

الراديو

احمد عبد المنعم امين شمروخ
مصر / معلم

الراديو كان مفتوح .. والعقل مال ع الروح

لما شاف عنيتها القلب ليه وهوج ؟

ازاي برئ قلب التراب واهوج ؟

كدة يبقي مين ؟

الضلع ولا القلب كان اعوج ؟

فالراديو قال..

قالوا تسلي عن المحبوب .. قلت بمين

ماهي حوا واحدة وجنتي ما فيهاش كتير حور عين

كانت هدية من هدايا الرب للقلب الوحيد

نايم بيصحي ع الايديين حاضناه

كبر وقال الله

من وقتها قلبه الطري عرف الفرح والعيد

الرب قال .. قول الاسامي للجميع

قلبه اللي داق المعرفة راح قال

سميتها حوا عشان فيها الحياة

ابليس ضحك ... خايف اكيد م الموت ... قلبه ارتجف

كان اول الشك اللعين وسواس

مممكن صحيح الموت يخطف امانى الناس ؟ وارجع وحيد

فالراديو قال ... قل للمليحة ف الخمار الاسود..

ماذا فعلت بآدم متعبد ؟

المشكلة ف زهو التراب والمخلوقين من طين

لو قلبه داق المعرفة اوقات بيتكبر علي طرح السؤال

لو كان سأل؟ لو كان طرح خوفه اللعين؟ لو باح؟
ازاي عنيتها تكون..مفتاح لكون.. الذنب فيه تفاح؟
مختال ما تعرف خاف.. لو كان سأل كان عرف
وان كان عرف كان وصل.. وان كان وصل كان شاف
ان السؤال انصاف.. فالراديو قال:
قلبي اللي عاش خايف..... جناحات عيونه ضعاف
ف الاصل كان شايف.....ولا اتعمي قام شاف.